

Despois de case once anos conta con douscentos cincuenta socios

ACRD Santa Mariña do Monte, once anos dinamizando a parroquia

A Asociación Cultural, Recreativa e Deportiva San Loureiro de Santa Mariña do Monte creouse para dinamizar a parroquia e ter un local social como punto de encontro dos veciños e veciñas.



Mulleres participantes nas clases de manuaisidades realizadas dende o principio da asociación.

Pepa Cartelle

Durante o ano noventa e sete moitos dos veciños de Santa Mariña comezaron a falar da posibilidade de formar unha sociedade para organizar actividades. Lembran que se xuntaban nos partidos dos equipos de fútbol e no grupo de baile galego e gaitas "Nos". "Era cousa nosa, gustábanos e pasábámo-lo moi ben", comenta a directiva.

Así que Manuel Domínguez, veciño cunha disposición especial ao asociacionismo convocou a primeira asemblea e apoiado por moitos deles, e constituíuse a primeira directiva con seis voluntarios. O vinte e dous de maio do 98 tres homes e tres mulleres cheos de ilusión responsabilizáronse das tarefas da asociación, impulsando a colaboración e a aportación de ideas, sempre dende o seu traballo voluntario. "Quixemos poñer o nome do Monte, a secas, pero por ser moi curto, tivemos que engadir algo".

"Na Xunta directiva somos seis persoas e os cargos renóvanse

cada dous anos, logo podes repetir". Agora son Maribel, Amparo, Eva e Belén, que forman parte da actual directiva, as que falan, pero "Falta Marina e Abelardo", tamén lembran a Andrés e a todos aqueles que tamén colaboran activamente malia non ser da directiva, como Fernando o marido de Amparo.

O local social

Cando foi a parcelación que-daron terras de masas comúns que non pertencían a ningún, cos cartos recadados pola parcelación mercouse o terreo onde hoxe se atopa o local social. Derribouse a antiga escola dos nenos, un edificio dos anos 40 sobre o que está feito o actual local, xa que antes, xunto a outro edificio que era a escola das nenas, formaban a escola unitaria de Santa Mariña.

O local consta de dous pisos con aseos, pequeno almacén, sala de xuntas, dúas salas e cociña con lareira incluída.

Ainda non teñen internet nin ordenadores pero agardan a chegada do Wimax e dos equi-

pamentos correspondentes para conseguilo. "Sei que pensan que temos moita sorte por ter este local pero botamos en falta un salón de actos, un espazo cuberto multiuso. Agora ven o Antroido e..."

O local de Santa Mariña ten cerca unha pista deportiva para a práctica de fútbol así como unha ampla zona verde para o esparcemento e a poucos metros está a área recreativa.

O local está aberto todos os días da semana pola tarde e os sábados e domingos en función da programación, "o que queremos é que todos teñan un lugar para reunirse e pasar o tempo de lecer".

Socios

Na actualidade conta con 250 socios que integran esta entidade mantida polos pagos das cotas e ás subvencións dadas pola Deputación Provincial, Xunta, Concello e outras entidades privadas. "No 2008 houbo 6 baixas e 27 altas", manteñen o número de socios que proveñen tamén doutros sitios, Narón, Neda, Fene, Valdovíño e Ferrón.

Cambio de directiva

A 24 de xaneiro do 2009, a directiva está pendente de celebrar unha asemblea para renovar cargos. Polo temporal suspendeuse ata seguinte aviso. Animán a xente a participar porque necesitan axuda para traballar en organizar cousas. "Para pasalo ben estamos todos", pero botan en falla a xente nova, que si hai pero non acude.

"Comprendemos que a xente de 70 anos non queira pelexar, quen ten que traballar é a xente nova."

Actividades organizadas

Ofertan actividades diversas mantendo relación co concello e outras entidades colaboradoras. Dende hai dez anos ofertan o curso de manualidades e as exposicións dos traballos feitos son todo un acontecemento no fin do curso. O campionato de tute e dominó celébrase ao longo de todo o inverno. Curso de arte floral, obradoiros infantís e conferencias. Tamén celebran o Antroido, a camiñata a San Andrés a pé, no mes de xullo, e o San Loureiro. Actividades mantidas ao longo dos anos polas directivas.

A actividade máis curiosa, que non voltou a repetirse, foi unha



Maribel, Amparo, Eva e Belén da directiva actual e suspiros con lembranzas das primeiras da directiva.

volta ciclista a Santa Mariña do Monte para nenos e adultos, "todo o mundo viña ver a correr ós demais. Fixémola dous anos, percorrían toda a parroquia."

San Loureiro

Sen dúbida é o prato forte. Célebrense en outubro. Esta festa veciñal distinta marcou a creación da persoa do San Loureiro. O patrón da parroquia é Santa Mariña e celébrase o San Antón, pero eles decidiron celebrar o San Loureiro.

Comezaron de cero, ofrecérase a Coral de Lago para cantar pero non tiñan cartos para a carpa. Entón decidiron facer unha festa para recadar algo de cartos.

A grazza comezou co nome, que derivou en San Loureiro. Se funcionaba cada ano cambiábase o nome, sempre de árbores, San Bidueiro, San Carballo, ... Pero foi tan ben que quedou así.

"É unha festa para facer algo onde participe a xente durante todo o día". Comezan coa misa onde cantan, rezan ou axeónllanse segun festival de teatro, desfiles, bailes, recreando parodias de programas da tele coñecidos e sempre con moito humor. Á noite cea-baile amenizada con música. O concello colabora cunha actuación.

Outras actividades

Participan tamén en moitas actividades ofertadas polo Concello, dende hai anos teñen un grupo de asistentes de rehabilitación para persoas maiores e asistiron a un curso de cuidadores por Benestar Social.

A actividade "Tempo de mulleres" funcionou moi ben, van solicitar o módulo 2 á Dirección de




Mulleres participantes en rehabilitación para persoas maiores diante do edificio do local social.

Vicepresidencia e Secretaría de Igualdade e Benestar, con esta actividade realizarán unha viaxe de 3 días a Panxón.

Sempre procuran dar facilidades a todas as actividades que se queren organizar no centro social porque moitos veciños non asistirían ás mesmas no caso de se ter que desprazar ata San Durniño.

Proxectos de futuro

O primeiro plan que teñen de cara ao futuro é constituír a nova directiva, organizar o Antroido, construír unha fosa séptica para o local e un acto especial para o 16 de maio. Pretenden xuntar a todas as persoas que tiveron algún vínculo con Santa Mariña por ser nado ou veciño ocasional de aquí. Por que xuntala? "Porque sempre se escoita fulano de tal, o sobriño de... xente que te coñece e ti a ela non. Queremos ver cantos somos de aquí e estamos desperdigados, e non só vernos en enterros e bautizos. Xa contactamos con antigos mestres pero os que máis nos costa atopar é aos caseiros, aquelas familias que tiñan traballadores nas casas."



Descansano drepós da camiñata a San Andrés que xunta a máis de cento vinte colas.